

Wednesday, March 12, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

AGRICULTURE MINISTER

Agriculture Minister Pu PC Vanlalruata'n sawhthing lei tawhna man pek kim a la ni loh thu House a hrilh.

He thu hi vawiina Assembly rorel inkhawma zawhna leh chhanna hunah sawiin, sawhthing an buk tawh engemawzat man chu ni 7 chhungin pek nghal a ni a ti a, hetihruah hian sawhthing collection centre-ah sawhthing buk tawh si, a man la tihfel loh a la awm tih sawiin nakin zelah sorkar a inrawlh loh hunah loneitute hnenah thlai hralhna man a luh nghal theihna turin an inzirtir chho mek a ti a, loneitu bank account la nei remchang lote chu an sawhthing hralhna man society account-ah a lut tih a sawi bawk. Minister chuan India-ah sawhthing rate a hniam avangin Mizoram sorkar chuan kuthnahthawktute hnenah sawhthing leina, support price cheng 50 a pe nghal a ti a, a dahna tur bah cheng 10 zela leiin a thlawnin kuthnathawktute hnenah a pe tih sawiin kuthnathawktute'n sawhthing an tharna hmun atanga Secondary Collection Centre-a an phurh thlen man chu sawhthing neitute emaw society emawte tum tur a ni a, tun dinhmuna Secondary Collection Centre dah belh tumna a awm rih lo tih a sawi bawk.

Agriculture Minister chuan Financial Year 2023-2024 kumtawp dawna cheng vbc 110 dah chu hman zawh a la nih loh avangin kumin Financial Year 2024-2025 chhungin thlai thar leina tur pawisa ruahmanna hran siam a ni lo a ti a, sorkar chuan cheng vbc 110 atangin thlai thar lei nan cheng vbc 28 an hmang tawh tih sawiin sorkar chuan aieng tharchhuaktuten a sawngbawltute hnena an hralh theih hun atan kumin January thla atanga May thla inkar a ruahman sak a ti a, aieng hring chu a sawngbawltu hnenah kg khatah cheng 20 a an hralh theihna turin an ruahman tih a sawi bawk.



SPORTS & YOUTH MINISTER

Sports & Youth Minister Lalnghinglova Hmar-in 'Bana Kaih – Empowering Mizoram Sports' hnuaiah kum 2036-a India-in Olympics a thlen turah Mizo infiammite tel ve theihna turin theihtawp an chhuah tih House a hrilh.

He thu hi vawiina Assembly thutkhawma zawhna leh chhanna hunah sawiin, Sports Minister chuan Bana Kaih – Empowering Mizoram Sports hnuaiah kum 2036-a India-in Summer Olympics a thlen turah Mizo infiammite tel ve theihna tur chu an buaipui ber a ni a ti a, theihtawp an chhuah mek tih sawiin kum 8 atanga kum 15 inkar training pekna tura duan a nih thu leh Mizoram khaw tin atanga dil theih a nih thu sawiin, infiamna lar lam ni lovin medal dawn theihna tur infiamna lam insawrbing dawn tih sawiin hei hi Public-

Private Partnership, PPP mode a kalpui tur a ni a ti a, Bana Kaih hnuaiah cheng vbc 2 leh nuai 50 an dawng tawh tih sawiin coach tuai hriamna kalpui turin phailam nen an indawr mek a, infiamna thuamhnaw leh hmanraw tha hmang thei turin Mizoram sorkarin hma a la mek tih a sawi bawk.

Sports Minister chuan tunhnaia Hyderabad-a Union Sports Minister Dr. Mansukh Mandaviya hova ramchhunga infiamna tihhmasawn dan tur sawihonaah India-in kum 2036-a Summer Olympics a thlen turah Mizoramin infiamna thenkhat a thlen ve theih em tih chungchang an sawi lang tih a sawi bawk.



POWER MINISTER

Power & Electricity Minister Pu F. Rodingliana'n tun dinhmunah sorkarin eng chhit man bill ba a nei lova, sorkar hmasa ba zawng zawng pawh an pe tla vek tawh tih a sawi.

He thu hi vawiina Assembly rorel inkhawmah sawiin, Minister chuan eng chhit man bill vbch 200 dawn ba chu an rul vek tawh a ti a, tun dinhmunah leiba an rulh that avanga pawisa hmuh let vbch 2 leh nuai 6 dawn an nei tawh tih House a hrilh a ni. Minister chuan Tuirini Hydel project pawmpuina an hmu tawh tih sawiin an khuap thei a nih chuan Megawatt 24 a nih dawn thu leh cheng vbc 676.79 a ni dawn a ti a, sum chungchangah pawh New Development Bank te nen New Delhi-ah an inhmukhawm tawh tih sawiin sawrkar laipui lam pawhin an phur pui hle a ti a, reiloteah a chhanna phuisui zawk an dawn thuai a beisei a ni a ti bawk.

Minister chuan Serlui B thuam tha turin study team ten thawm that a ngaih dan an zirchiang tawh a ti a, siamthat ngai lian zual siamtha turin hun leh tha bakah cheng vbc tam tak a ngai dawn tih sawiin sorkar sum dinhmunin a zir loh avangin a theih angin hma an la mek a ti a, megawatt tam vak lo in an kalpui mek tih sawiin nikum 2024 March thla thleng khan Lawngtlai district-ah kawlphehtha luh lohna, khua 48 awmin hma an la mek tih a sawi bawk.

Minister chuan tun dinhmuna Mizoramin kawlphehtha a intodelh theihna tura sorkar-in tuikhuah (Hydel Project) pathum a kalpui mek te thlen chin chu House a hrilh a, kumina zawh hman beisei a ni tih a sawi bawk a ni.



MPCC DEMONSTRATION

Mizoram Pradesh Congress Committee chuan Assembly thutkhawmah Chief Minister Pu Lalduhoma'n Lawngtlai West bialtu MLA Pu C. Ngunlianchunga chungah mawilo taka a chet avangin vawiin khan Aizawl Treasury Square ah lungawilohna lantirin an pungkhawm.

Punkhawmna ah hian MPCC General Secretary Pu TT Zothansanga'n Ram rorelna sangah Mizoram humhim tu tura an ngaih Chief Minister Pu Lalduhawma'n a member puite zah lova thil a sawina avangin Zoram Rorelna hmun zahawmna a hloh mek a ti a, Chief Minster in a member puite chung a rilru put hmang enin Pu C Ngunlianchunga bakah eptu lam te thlavang hauh tura MPCC member te chu pungkhawm an nih thu sawiin Assembly Session neih mekah Chief Minister Pu Lalduhawma'n zawhna a chhan danah MPCC

chu a dam thei lo tih sawiin Pu C Ngunlianchunga hnenah Chief Minister chuan House leh Zoram mipui hnenah ngaihdam dil tura a duh thu a sawi.

Pu TT Zothansanga chuan ZPM Party chuan eiruk an duhlo tiin tlangau mahse eiruk avanga thubuai nei lai Pu V. Zirsanga chu CEM atan an duh tho tih sawiin hei hian eirukna an huatlohzia lantirtu ani tih a sawi bawk.

Vawiina punkhawmah hian Congress member thahnem tak leh Mizoram Police te chu an innawr a, Congress member atangin hliam tuar mi 2 an awm a ni.



MNF PRESS CONFERENCE

MNF National Core Committee (NCC) member Pu Lalchamliana chuan AR insawn chhuah chungchangah CM in thu dik tawk lo a sawi a ni, a ti.

Aizawl Press Club-a chanchinbu mite hmaah Pu Lalchamliana chuan sawiin Assembly Budget Session neih mekah March ni 10 khan Chief Minister Pu Lalduhoma’n Assam Rifles te Aizawl khawpui laili atanga sawn chhuak turin sorkar hmasa hunlaia hmalaknaah Home Department nena (Memorandum of Agreement) an lo siam pawm tlakah an ngai lo tia a sawi chu thudik tawklo a ni a ti a, Ngaihtuahna fim tak nena rim taka lo buaipuitu Home Department-a thawktute tih mualpho tumna ani tih sawiin thudik famkim lo CM in a sawi chu pawl atih thu a sawi bawk.

